

学行典

學行典第二百五十四卷

篤行部名賢列傳二十二

明十五 曾猷

按建昌府志曾猷字獻嘉號裕齋南豐人庠生性質嚴毅自少慕古其文行不與時類食不重肉寒不衣絮議論動止硜硜如也將貢被黜不少介意讀書山室浩歌自得

黃隆

按建昌府志黃隆南豐人富而好行其德歲饑賴以救活甚衆餽餉禦寇全城之功尤大

湯邦翰

按建昌府志湯邦翰字良甫號純齋南豐人舉人祀縣鄉賢事祖父母以孝聞撫二孤姪讓以餘產有宰牛者縣罰金爲公車費翰還其金勸以改行卒爲良民將謁選見守令事上屈抑志不得行曰吾豈能隨俗俯仰自負所學乎遂終身不仕好讀性理大全及陶詩雖耄期手不釋卷

黃有仁

子鳳陽

按建昌府志黃有仁字新甫太學生官州同知績茂循良致隆恬隱夙厚樹典型以矜式諸人更樂施賑恤而佐成大政賦性簡默厚重和易安閒修己講學綽有古賢哲遺蹤居恆孝友天植仁慈夙成卽今年春天災流行饑疫相尋郡邑餓殍盈村骸骨徧塗偕其仲子鳳陽出帑金發倉粟施棺給粥無算儻所謂富而好行其德者非耶

黃文經

按建昌府志黃文經字景綸號桓撥南豐人中進士第湘潭知縣湘邑城卑僅可數尺許捐俸增築屹然改觀却藩使拒紳牘校士以公清驛惟嚴歸遇歲荒開倉以待活者無算性和易與人言洞見肺腑橫逆至者不與較常曰難處之事應之以寬難處之人待之以恕教子弟惟以朴誠謙厚雖處失意未嘗有愠色曰造命吾所不能吾所知者安命而已疾革時鄉人日禱于家旣沒有撫棺而慟者

鄧瑜

按建昌府志鄧瑜字宜清新城人嘗發粟賑饑官表其門曰彰義坊爲學宮造橋造門又割田二百

畝以助今學田尙存義士之名尙在而子孫無復知者

涂瀘

按建昌府志涂瀘字毓秀號霽川新城人欽元孫舉人潯州知府永嘉稱難治調劑周勤不事聲色吏牘民志久益晏然有問其得民之道曰無他惟積誠而已其家居見盜夜潛於厠呼出慰贈遣之不問其名姓

王二存

按金谿縣志王二存家於世宦城南學前里幼穎慧博洽經史及弱冠補弟子員食邑餼立城南文社約同志者數人悉屬谿邑領袖不數科而前後登科甲存獨艱於嗣喟然曰功名之被於一身者輕而苗裔之係於宗祧者重遂視咕嗶爲餘事以積德累行爲兢兢凡立渡立橋賑乏者不一猶慮其施之不廣也予人以可受之名曰無息債誠於布德施惠罔間親疎天之報善不爽果舉五子長幼俱補邑庠孫支世守其德不替云

車元俊

按金谿縣志車元俊字冲甫忍叟其別號也幼讀書不爲章句之學弱冠偕廉憲肄業南雍當承平右文之世留京人士霞蔚雲蒸未幾廉憲獨捷京闈成進士俊數奇不售歸里不復問京兆事廉憲治兵秦楚用勞瘁卒官俊痛心先烈于國家典章制度兵餉扼塞多所咨識名聞諸公方伯王龍友特舉應賢良之詔而俊謝絕弓旌人以龔勝管寧方之歲凶發粟以賑饑者市糲以衣寒者周人緩急惟恐後不計其報厥嗣趾美光大先人之烈固有在此而不在彼者可不謂有道仁人哉

蔡文清

按金谿縣志蔡文清王二存長女子也幼穎異年甫十三應童子試郡侯蘇閔三奇首拔以冠六邑鄉紳默吾李愈大奇之而以長孫諱大覺之姊妻焉六試棘園三登乙榜族有貧賣妻者清檢囊中無所有將居肆鬻之以全其偶族與鄰閭清曰鄰好不可傷也代出金修睦焉值途有遺金清偶拾之必密訪全還行誼篤摯類如此子筮亭邑庠生

樂譜

按東鄉縣志樂譜字叔和邑庠生長林人崙之曾孫廷槐之孫也生平敦信義尙風節好周人急有

古慷慨俠烈之行會秦晉齊豫饑譖聞之首助穀二百石

何鏜

按東鄉縣志何鏜何坊人邑庠生閤然自修賑貧恤孤厚與薄取前令周蓐厓蔡龍屏俱以詩文贈之都御史以旌善匾其廬

俞朝貴

按東鄉縣志俞朝貴橫山人邑庠生天性孝友持己端方有古人風鄉里以忿爭求質徐出一言解之有爲不義者愧懼不令其知舉鄉飲賓力辭不赴

何東

按東鄉縣志何東何坊人爲諸生時力學不倦天性孝友與人誠確不欺以善行著于鄉縣採其實聞之撫按賜布帛匾其廬復獎以孝親尊祖友愛來弟族之歡賑乏恤孤德義重存沒之感云

龍珩

按吉安府志龍珩永新人以上舍謁選京師值鄒忠介抗疏劾江陵廷杖幾斃一時知交親暱無敢

近者翊初未相識亟往救之躬負入獄朝夕護視人服其義

王元統

按吉安府志王元統安福人八歲而孤事母孝有堂兄利其居輒踞之忍而不較家貧陋巷種樹課農桑自給晏如也力學通經史數奇弗售遂棄舉子業庭訓肅睦見學者與其子言正言行正行則大喜留坐終日若棋酒諧謔則拂然屏處不願見曰蘭艾薰猶不可不別也以故子貴不敢驕人獨創祖祠建義倉多行善事當路重其行祀鄉賢著有日恭子

李尙德

按吉安府志李尙德號如賓吉水人性豪爽任俠刻勵讀書不第改胄監爲真定府幕時熊廷弼爲司李重其才引置左右凡所設施皆其措畫熊與太守不合恨尙德附熊誣以事後寤遂釋尙德遂棄簪冠歸里里中貧乏悉仰給之園池居室爲族人侵踞亦弗較曰吾有子幸能讀書不憂貧也與同邑曾同亨一意爲地方興除如修學宮及雪浪閣復同江水次本里保禦皆其經營不遺餘力里人至今賴焉

彭日新 子際遇

按吉安府志彭日新安福人官經歷卽棄不仕性仁厚軫恤親族周人困急年九十四屢舉賓飲其子際遇如其官亦好行陰德或轉貸于人不遺餘力有嫁其妻償逋者遇代酬之其人竟不知姓名世德隱行如此

羅士友

按吉安府志羅士友字兼善一字晉卿世爲廬陵之新安人士友生五歲容止去幼度未弱冠喪父卽取先逋券焚棄之曰迫人非仁也人有急亟振之有負之者無少動于色久之自悔愧且死而士友益恩恤其妻子士友爲人謹約旦起盥櫛畢危坐堂中終日不惰倚雖盛寒暑以爲常端靜對賓客賓客或不能自持閨中無敢疾呼女隸無敢近几席由是里之言家法者皆曰羅氏遺文有史編及諸家詩體

鄒匡明

按吉安府志鄒匡明字子尹安福人四山第四子也負才學爲太學生嘗歷南北雍兩中副榜一擬

解元不果第已乃棄去遊學于燕趙齊楚間性孝友與人無畛域爲季父後得所遺七千金施予立盡常過宜黃出三十萬文爲涂氏子酬逋涂氏子素未常識明也其豁達類如此邑北濱大江涉者苦之四山倡建鳳林橋功未竟罄其家給之復不足於是披緇乞助于人橋賴以成沒祀鄉賢所著有苦竹淡竹法雲翰音駢語等集同邑趙士康讀書目十行下長詩古文辭後學有疑義及古事皆折衷之所著有蟬吟詩可矣軒覽古彙編桃源日聽

李挺

按吉安府志李挺號一吾安福人爲邑諸生師事劉三五倡學南里有時瞑目習靜望如木偶邑侯閔世翔高其行破格造請邑中興除大利害多所取裁而挺不言其事有富民爲仇家所中侯密以訊挺挺對不知數問乃對曰果係渠惡挺獨不聞乎侯領之事竟寢又有投匿名書于縣而署名其尾挺笑曰旣云匿名復自署之詎人情乎侯服其敏達釋之挺中表大宰歐疾革念挺貧授以金不納則投以田亦不納歐曰非以云贈實爲托吾孤也挺曰撫孤事重厚托誓不敢受挺故貧或日不再食歲不易衣晏如也隱行節操不可勝紀授徒甚衆同里李道卿多隱行其高弟云

夏夢夔

按吉安府志夏夢夔號雲屏安福人棄舉子業不就試從學鄒文莊讀書南嶽三年而歸邑令閔師事之邑清丈田畝左右文莊剔弊除害至今賴焉常爲母市材於楚時劉虞部權荊州與夔夙契不一謁劉揖之河干欲有所屬夔正色曰某來爲母須材非有所求也有巨商以誣越關沒貨萬計商持千金來請夔曰吾生平未嘗以私干人及歸劉餞之舟中因語劉曰某昨夜舟中聞有越關得罪者實出於誣語畢解纜去劉遂釋其人曰非江西夏某幾冤爾商齎數百金追謝夔曰彼自恤爾吾未嘗言也堅弗受商感泣去事親孝父病篤爲之嘗惡及居喪寢苦廬墓悉中禮年七十五以壽終易簣時諸賢達以祠鄉賢爲請堅持不可口占一律乃瞑

羅晉用

按吉安府志羅晉用字楚材太和人生平畏事如處女言若不出諸口擇所與交不過幾人曾學醫得異傳無問富貧一應之雖屢著奇效而終不言利與人退然不以醫自名常言吾愛龐安輅財如糞土耐事如慈母人以爲晉用實似之劉雲章陳海桑皆稱之爲篤行君子云

歐陽務本

按吉安府志歐陽務本號雲谷廬陵人性慷慨急大義嘗捐貲建祠爲族人營婚葬傾橐無所靳歲甲寅邑里大歉乃罄囷中粟哺饑時兵憲吳檄民輸粟者予冠帶里中士將撫其事以應辭弗受常遊粵西全州信義孚於人時西延騷以私忿內訌州大夫不能制奉檄往諭力陳利害騷遂帖然州大夫嘉其能全人稱焉晚歲夷猶田閒對客徐引談笑風生人欽其雅度云年八十以壽終以子貴贈南京兵部主事祀鄉賢祠

周啟龍

按吉安府志周啟龍號雙池安福東鄉人後徙居郡西事父母孝謹親沒廬墓三年哀慟中禮居平守正不阿周人困乏人有疾病扶持之貧不能殯者殯之歲戊寅旱捐囷以活貧者年八十四以壽終

朱繼德

子晉楫

按瑞州府志朱繼德高安人善士達善之子也任真定衛經歷頗有能聲復委署稿城邑篆大得民

心至攀轅不忍捨任三載以親老乞養三院薦留不得益羨其高旋丁父憂養母孝敬備至敦睦族黨內外無閒言平生見老貧孤寡憐而周之施屨以濟途人無算修建飛仙等橋十數區生平兢持至老爲善不倦人稱篤行君子其子吾楫事嫡母孝以弟子員入監謁選授光祿署丞以養親歸建大市橋好義樂施祖孫四世並以善稱

袁文煥

弟文道 文謨

按瑞州府志袁文煥高安人幼孤與弟文道文謨並敦孝友五世同居有古義門風值歲饑輸粟三百石賑貧施藥施棺趙按院陳按院俱召面獎錄名旌善亭文道以辦事候選衛經歷不就官好行其德於鄉如修兩城解南折建兌倉改官運皆捐貲以董其成好讀書與諸先達結社廣和著有樂耕編諸集知府周之基請賓鄉飲文謨事母尤孝謹戊子大荒首倡出粟賑饑郡縣屢舉鄉飲賓不赴御史曹汝蘭銘其墓曰惟孝友于爲仁之本雖曰未學純乎其純

劉子立

按瑞州府志劉子立字以中高安人天性孝友年十五失所怙貧無地安厝日夕悲泣神遂告以葬

處善事母吳氏病失明不離左右者十餘年吳卒廬墓側兄弟五人皆其完娶仲弟季弟天卒撫其孤如己子孝友敦睦人無間言尤博洽經史試輒首多士聚徒至百餘人一時縉紳多出其門嘗授經於鄒東郭與鄧元錫傅明應論道後園書社交相砥礪筠陽有劉夫子之風有劇盜過其門相與戒曰此劉某家不可犯其孚及於人如此憫筠俗棄女身育五女以爲之倡作育女文以勸之感而舉女者不可勝紀愛邑賦偏重杖義與吳會廖寶等極力條陳得改南折筠人德之惜九科不第以歲貢卒於京所著有易經新義孝經註疏二史抄大學衍義纂藏於家祀鄉賢

蔡必大

按瑞州府志蔡必大字弘道新昌人積學潛修不事進取家稍饒鄰有窶人來糴者輒還其直值天久雨雪知鄰族有不舉火者晨起持錢置其戶限內不令其知爲己德

周宗道

按武昌府志周宗道字弘軒醇厚悃悃誠信不欺伯叔貧窶則割產以週里人有急感感然急之有善好之不啻己出爲弟子員數十年栖真樂道恬如也子事一旣錄賢書猶日夕督課更以清白勉

之

胡來晉

按武昌府志胡來晉字九山敦義嗜書施予自好鄉里貧乏者資給之無恡色族有鬻身者捐金代贖兼爲娶婦獲盜于家不播其名但扶出而已孫勳登戊午鄉薦

曹子忠

按武昌府志曹子忠字龍山幼補弟子員爲先達徐鳳竹所賞爲人好施予重然諾家產逾萬盡以周人之急晚遊方外足不及市閭

姜學周

按武昌府志姜學周字起予性端慤孝友聞于鄉雅欲以經術自奮篝燈弗輟自分數奇棄去之一意教子子恆舉己卯鄉試故事郡邑鐫楔樹幟以光其閭周從屏幃間出視衣履如舊喜色不形家少年有請更服者乃正色曰老人方欲導之廉謹爲他日地可自失其本色耶其任眞如此

胡富

按武昌府志胡富字近山世居東關爲人恬淡寡營與物無競惟愛邵康節焚香吟口誦不絕并繪其像與其吟刊布于世有抱病無醫者常製藥餌以濟之閒有歿而不能殮者經營其棺槨曾於隨州店次拾遺金二十餘兩還其主其人感泣割金以謝弗受生平懿行大率類此孫鳴皋登庚戌科進士里人原其祖德焉

余必迪

按武昌府志余必迪字石丘爲人醇謹和惠常好行陰鷲事歲饑傾廩寒卽解衣未嘗以德色矜人亦不乞知於有司慕義樂施下及爲梁道路之細捐資輸力不可勝數一經食報五子俱列俊髦以子振衡貴加贈中憲大夫

陳應魁

按武昌府志陳應魁字以兆好善喜施力行不倦如觀音閣遭癸未火劫魁家於其側目擊閣像灰燼鬻產鑄像購木連雲其經營拮据寒暑無間而濟貧撫孤賑饑救溺懿行有不能殫述者一時上憲咸稱爲善士云

郭儀

按武昌府志郭儀奉母以孝聞生平豪俠晨起捕魚拾遺金一釜於湖中以足掩坎仰天頓首曰天乎如爲儀財勿以不義至當從生理中得之歸家絕口不以告妻子平居持一木梃里巷人有鬪輒杖其不義者人敬畏之

孟佻

按武昌縣志孟佻號蓮湖累封河南叅政幼孤撫於祖父豪爽高適不樂仕進未幾祖父見背事繼祖母以孝聞宗族鄉黨中有不直事輒相戒曰毋使孟君知其月旦雅重如此庚申己丑兩灾殍饑藉道罄產賑濟凡活數萬命邑人至今德之邑西有西竺寒溪邑東有報恩寺年久傾圯又檀布茸修竟成偉刹至橋梁道路博施廣濟厥後克昌長習孔早年聯捷巍第任太僕卿直聲聞於中外次心孔由明經官別駕諸孫多貴顯佻蕭然布素出入不乘輿張蓋年八十餘猶軒舉矍鑠邑人嘗誦之曰生平無一皺眉事有完福不觸二三尺童子有完德不染一疾含笑而終有完壽舉賓筵十數次鄉賢崇祀

陳俊

按武昌府志陳俊性剛直任丹陽稅課甫二年遂告歸與王倫楊瓚築梅坡書舍以居丁未旱出穀濟饑存活甚衆伐木爲棺收葬無主者三千人年九十五終

李德智

按武昌府志李德智字太痴生平薄名利好黃老養生之術一日晨起坐門前見丐者倚門而目逆之李老曰汝丐也奚視焉毋以丐而盜乎曰某非丐亦非盜也某銅鼓衛人本衛以墳房料銀六十餘金納之都司緣過黑牛渡舟覆文移溺水中欲歸而請之某以孤身挾重貲汎洞庭恐不免聞公厚德願以相累俟返而復求取納焉以四十日爲期其人去死于路遇所知陳大道歸告喪喪歸衛勘官銀無有逮其家人則意前所知告喪者匿官錢文致其罪當死李老久不得其人至恐事有變遂封前銀詣都司納焉都司爲文往勘之則其告喪者尙在獄中縣令大驚曰楚有大賢人若此乎召囚來焚香籲天曰我拜前爾拜後此非常人也陳氏二人遂獲免李老生平服清齋不苟葷嘗以五靈神符治百病壽八十九終